

1. Արարատ լեռան ձյունապատ սրտից
 Հնչում է մի ձայն դարերի խորքից,
 Մասիսի ծոցում մի սիրտ բաբախում,
 Զարկում է անվերջ, հայ ազգին կանչում.
 «Դարձե՛ք, ղ՛վ հայեր ողջ Հայաստանի,
 Ես իմ տապանն եմ կանչում բոլորիդ,
 Այսօր ներս մտեք իմ եկեղեցին,
 Դարձե՛ք ողջ ազգով, ժամն է վերջանում»:

2. Արարատ լեռան կարոտած սրտից
 Հայոց աշխարհ է թռչում աղավնին,
 Ավետիս սրտում, ծիթենին կտցին՝
 «Խաղաղություն քեզ», - ասելու հային:
 «Դարձի՛ր, ազգս հայ, դարձի՛ր անվարան,
 Արյուն, ջարդ, աղետ պիտի վերջանան,
 Ես քեզ կլինեմ վահան ու պաշտպան,
 Դարձի՛ր, քեզ կտամ խաղաղ Հայաստան»:

3. Արարատ լեռան թախանձոտ սրտից
 Հային է ուղղված պատգամն երկնքից.
 «Կանգնած թակում եմ դուռը քո սրտի,
 Հայոց աշխարհն է նոր իջևանն իմ:
 Դարձի՛ր, ազգս հայ, ես քեզ կդառնամ,
 Մեղքերդ կներեմ, երկիրդ կբուժեմ,
 Ես քեզ կսիրեմ միշտ և հավիտյան,
 Ես քո Աստվածն եմ, իմն ես, Հայաստան»: